

### **Кондак 1**

Избранной Богом Владычице всей твари, благословенной Марии Деве Богородице, приносим смиренное поклонение Святому Твоему образу. Ты же, о Пренепорочная, прими молитву недостойных раб Твоих, почитающих Крестныя страдания Сына Твоего и Бога нашего, со умилением зовущих Ти:

Радуйся, Невесто Невестная.

### **Икос 1**

Ангели предсташа к держимому в объятиях Твоих Сыну Твоему и Богу нашему, показоваху орудия Крестныя, мы же со страхом поклоняемся страстем Сына Твоего, и зовем Ти:

Радуйся, Архангелов удивление;

Радуйся, Тайн Божиих Служительнице.

Радуйся, яко Дух Святой найде на Тя и сила Вышняго осени Тя;

Радуйся, яко рожденный от Тебе есть Сын Божий.

Радуйся, яко приснодевственное семя Твое сотре главу, гнездившагося в змии диавола;

Радуйся, яко Тобою ад огорчился и смерть умертвился.

Радуйся, Невесто Невестная.

### **Кондак 2**

Видяще, Пренепорочная, яко прииде Господь на землю, милости ради, да постраждет за грехи верующих в Него и вопиющих Ему: Аллилуиа.

### **Икос 2**

Разуме, Пренепорочная, глагол старца Симеона, Тебе же Самой в сердце пройдет оружие, да открыются от многих сердец помышления, тем со умилением зовем Ти:

Радуйся, Херувимов Светлейшая;

Радуйся, вся скорби от Ирода и иудей приявшая.

Радуйся, в пречистом рождестве Твоем сомнение от Иосифа понесшая;

Радуйся, яко во яслех безсловесных Бога повила и положила еси.

Радуйся, яко Тя с Сыном и Богом не име где главу подклонити;

Радуйся, яко Тобою человек бывает Бог, да Бог Адама соделает.

Радуйся, яко Тобою превознесется человеческое естество;

Радуйся, Невесто Невестная.

### **Кондак 3**

Силою укрепляема благодатною свыше, претерпе всякую скорбь и тесноту, любезно объят Сына Своего, со Архангелы вопиюще Ему: Аллилуиа.

### **Икос 3**

Имуще святую икону Твою, "Страстную" именуемую, яко шипок благовонный и яко сокровище многоценное, приносим Ти смиренно поклонение, зовуще:

Радуйся, Покровительнице обители Страстной;

Радуйся, изволившая святою иконою Твоею стати на месте сем.

Радуйся, благочестивому царю внушившая устроить обитель иноческую;

Радуйся, Стено нерушимая верных.

Радуйся, инокиням Помощница во спасении;

Радуйся, о всем мире Молитвенница непреложная.

Радуйся, Невесто Неве́стная.

#### **Кондак 4**

Бурею греховною смущаемы и отягченнии сном нерадения, припадаем святой иконе Твоей, благодарим милостивое посещение Твоею иконою на месте сем, поюще непрестанно Богу песнь: Аллилуиа.

#### **Икос 4**

Слышавше православнии людие града Москвы, яко повеле благочестивый царь принести икону нарицаемую "Страстною", сего ради и сrete ю много народа с царем, патриархом Иовом и всем Священным Собором, радостно возопиша:

Радуйся, радость и спасение наше;

Радуйся, Святыя Троицы Богогласная Горлице.

Радуйся, воззвание страданий Христовых;

Радуйся, спогребшая в страдании Сына Твоего.

Радуйся, подтверждение всеобщего воскресения;

Радуйся, высокий Кедре нашего безсмертия.

Радуйся, Невесто Неве́стная.

#### **Кондак 5**

Боготечная звезда указывает Тебе путь с Пренепорочным Младенцем. Мы же мысленно со Иосифом на пути сем припадаем, поюще рожденному Господу и Тебе: Аллилуиа.

#### **Икос 5**

Видеши, Всенепорочная, наше сокрушение о гресех, не имамы иныя помощи, ни инаго предстательства, токмо Тебе дадесея благодать молитися за ны, сего ради с верою зовем:

Радуйся, молитвами Твоими свобождающая нас пламене геенскаго;

Радуйся, молившаяся за весь мир у Креста Христова.

Радуйся, пламень страстей от человек отгоняющая;

Радуйся, светом пречистыя души Твоея всех просвещающая.

Радуйся, чистотою Твоею Ангелы удивившая;

Радуйся, яко демоны трепещут от пречистаго имени Твоего.

Радуйся, Невесто Неве́стная.

#### **Кондак 6**

Предстояще у Креста Сына Твоего и Бога нашего, лютое оружие пройде душу Твою, егда распинаху Жизнодавца на лобном месте, посреде двю разбойник, егда воины совлекоша ризы Его и метающие жребий о иматисме Его. Тогда разумная воинства пояху: Аллилуиа.

#### **Икос 6**

Возсиявши, яко светлая свеча, у Креста Сына Твоего, горяще любовью матернею, глаголюще: "Аще и страждеш на Кресте, но вем Тя, прежде денницы рождена". Видевши Пречистая, яко вся тварь вопиет Ти:

Радуйся, яко душою и телом предстоиши у Креста Зиждителю Твоему;

Радуйся, до последняго часа смерти, с Господом не разлучавшаяся.

Радуйся, яко у Креста рекла еси: "Вся земля сорыдайте горце, Жизнеподатель зрится, яко мертв";

Радуйся, Подательница нам вечнаго радования.

Радуйся, Невесто Невестная.

#### **Кондак 7**

Хотящим воспевати страсти Сына Твоего, помози, Владычице, и не отрини молящихся пред чудотворною Твоею иконою и воспевающих из глубины души песнь: Аллилуиа.

#### **Икос 7**

Новую милость людям явила еси, Владычице, иконою Твоею, егда принесше ю честно людие во град Москву, донесше до врат Тверских, и, о чудо! Икона Твоя Святая ста неподвижно на месте сем, идеже ныне обитель Пречистому Твоему Имени. Радостно вопием Ти:

Радуйся, Заступнице и Прибежище наше;

Радуйся, всякия скорби и печали отгнание.

Радуйся, благословение всем концем земли;

Радуйся, Невесто Невестная.

#### **Кондак 8**

Странное и преславное чудо богатя милости Твояе нам, недостойным, являеши, и всем, с любовью притекающим к чудотворней иконе Твоей и вопиющим: Аллилуиа.

#### **Икос 8**

Вси роди блажат Тя, Пренепорочная, видя Тя страждущую и молящуюся при Крестном страдании Сына Твоего и вопиющую к Нему: "Из прободеннаго Твоего ребра, сладчайший Сыне, источи бессмертие". Сего ради со умилением зовем Ти:

Радуйся, бессмертныя жизни сподобляющая рабы Твоя;

Радуйся, уготовляющая райския обители благочестно живущим.

Радуйся, Ходатаице вечнаго радования почитающим Тя;

Радуйся, спасение и заступление инокинь, призывающих Тя непрестанно.

Радуйся, покрывающая Своею благодатию всю вселенную;

Радуйся, Невесто Невестная.

#### **Кондак 9**

Вся страждеш при Кресте и вопиеш к распятому Господу: "Грядеш на страсть волею, Сыне, от страстей разреши Адама, и сущия от Адама, со беззаконными вменился еси, да от беззакония спасеш человека, зовуща: Аллилуиа!"

### **Икос 9**

Ветия многовещанная не возмогут воспеть страдания Твоя при Кресте. Ты же, о Пречистая, лице со власы терзающи и перси биюще, взывала еси: "Сыне, прими дух Мой и не остави Мене Едину". Мы же, недостойнии, умиленными гласы зовем Ти:

Радуйся, помогающая верным в час смерти;

Радуйся, сопровождающая всех христиан по лютым мытарствам.

Радуйся, освобождающая нас от демонского удержания;

Радуйся, Заступница христиан на Страшном Суде Божиим.

Радуйся, Ходатаице всем хотящим получитьи христианскую кончину;

Радуйся, Невесто Невестная.

### **Кондак 10**

Спасения прося нам, Пречистая, руки Твоя простерши, о многоблагоутробне Спасе, рекла еси, Страсти Твоя чтущих с праведным разбойником Твоим учини и спаси, Милосердие, вопиющая Тебе: Аллилуиа.

### **Икос 10**

Стена еси неоторимая, миру Прибежище, милости Сокровище, прими моления раб Твоих, предстоящих Святому образу Твоему и умильно зовущих Ти:

Радуйся, обрадованная, вечно блажимая Богородице;

Радуйся, грешным и смиренным известное Прибежище.

Радуйся, дев и сирот Заступнице;

Радуйся, людям крепкая Помощнице.

Радуйся, Святителем великое вразумление;

Радуйся, благоговейных иереев Руководительнице.

Радуйся, Невесто Невестная.

### **Кондак 11**

Пение умиленное и хвалу молебную сподоби приносить пред чудотворною иконою Твоею, Пресвятая Богоневесто, и не отврати лица Твоего от поющих Ти и Богу во веки: Аллилуиа.

### **Икос 11**

Яко светозарное солнце, возсия в храме нашем образ Твой, Страстная Богородице, освящая, сохраняя и спасая от бед всех страждущих и вопиющих с любовью:

Радуйся, сохраняющая благодатию Своею обитель иночествующих;

Радуйся, Помощнице крепкая борющимся со страстьми.

Радуйся, обидимых и угнетенных Заступнице;

Радуйся, нищих и убогих радование.

Радуйся, больных исцеление и подкрепление;

Радуйся, юных вразумление и наставнице.

Радуйся, Невесто Невестная.

### **Кондак 12**

Благодать Твою ниспосли нам, Благословенная, почитающим Святую икону Твою, и поклоняющимся Пречестным Страстем Сына Твоего с верою поющих: Аллилуиа.

## **Икос 12**

Поюще непрестанно пред Святою иконою Твоею, поклоняемся, величаем и со страхом лобызаем чудотворный образ Твой, радостно зывающе:

Радуйся, вечное наше радование;  
Радуйся, воскресения нашего Сокровище.  
Радуйся, от рова страстей нас свободящая;  
Радуйся, взыскание погибших и ума лишенных.  
Радуйся, исполняющая прошения верных;  
Радуйся, уповающим на Тя грехов прощение даруеши.  
Радуйся, Невесто Невестная.

## **Кондак 13**

О, Всепетая Мати, прими недостойных раб Твоих молитву, призри на предстоящая люди пред чудотворной иконою Твоею и усердно поклоняющихся Пречистым Страстем Сына Твоего, просящих избавления от вечных муки, вопиющих Тебе: Аллилуиа.

**Этот кондак читается трижды, затем икос 1-й и кондак 1-й**

### **Молитва к Пресвятой Богородице перед Ея иконой, именуемой «Страстная»**

О Пресвятая Госпоже Владычице Богородице, выши еси всех Ангел и Архангел, и всея твари честнейши, Помощница еси обидимых, ненадеющихся надеяние, убогих Заступница, печальных утешение, алчущих кормительница, нагих одеяние, больных исцеление, грешных спасение, христиан всех поможение и заступление. Спаси, Госпоже, и помилуй раб Твоих, и преосвященные митрополиты, архиепископы и епископы, и весь священнический и иноческий чин, и благоверный правительствующий синклит, и военачальники, и градоначальники, и христолюбивое воинство и доброхоты, и вся православные христиане ризою Твоею честною защити, и умоли, Госпоже, из Тебе без семени воплотившагося Христа Бога нашего, да препояшет нас силою Своею свыше, на невидимыя и видимыя враги наша. О Всемилостивая Госпоже Владычице Богородице, воздвигни нас из глубины греховных и избави нас от глада, губительства, от труса и потопа, от огня и меча, от нахождения иноплемennых и междоусобных брани, и от напрасной смерти, и от нападения вражия, и от тлетворных ветр, и от смертоносных язвы, и от всякого зла. Подаждь, Госпоже, мир и здравие рабом Твоим, всем православным христианом, и просвети им ум и очи сердечныя, еже ко спасению; и сподоби ны грешных рабы Твоя, Царствия Сына Твоего, Христа Бога нашего: яко держава Его благословенна и препрославлена, со Безначальным Его Отцем, и с Пресвятым и Благим и Животворящим Его Духом, ныне и присно и во веки веков. Аминь.

### **Тропарь Пресвятой Богородице перед Ея иконой, именуемой «Страстная»**

#### **Тропарь, глас 4:**

Днесь возсия неизреченно царствующему граду нашему Москве икона Богоматере, и, яко светозарным солнцем, пришествием тоя озарися весь мир, Небесныя силы и души праведных мысленно

торжествуют, радуешься, мы же, на ню взирающе, к Богородице со слезами вопием: о Всемиловитая Госпоже, Владычице Богородице, молися из Тебе воплощенному Христу, Богу нашему, да подаст мир и здравие всем христианом по велицей и неизреченней Своей милости.

**Ин тропарь, глас 4:**

Животворящей Премудрости источник чудес честный образ Твой, Богородице Дево, молящися, к нему любовь усердно притекающе, светло празднуем и из глубины души вопием Ти: спаси, Владычице, верою поклоняющихся цельбоносному Твоему святому образу, тем, благодаряще, Тя величаем, яко Матерь Божию, спаси архиереи Православныя, и сохрани землю Русскую и вся люди, иже Тебе чтущия, соблюди, да хвалебныя Ти дары, грешнии, приносим, Благодатная: радуйся, Дево, христиан похвало.

**Кондак, глас 3:**

Благодать прияхом нетления, еже даровала еси нам, спасительнаго Твоего целения чудотворным Твоим образом честным, Богородице Дево, темже вопием Ти и с радостию зовем, Госпоже Царице, молимтися умильно, грешнии, со слезами глаголюще: о Пресвятая Владычице, скорое нам яви заступление и помощь, спаси ны от супостат наших и от всякия скорби соблюди, землю нашу миром огради, и вся люди Твоя покрый, и соблюди на Тя уповаущия, потщися избавите, да не погибнем зле, раби Твои, но да зовем Ти: радуйся, Невесто Невестная.

**Величание**

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою притекающим.

[Празднование 13/26 августа](#)